

“LAYLI VA MAJNUN” DOSTONIDA TASAVVUFONA G’OYALARNING RUJU’ SAN’ATI ORQALI BERILISHI

Ernazarova Nilufar Umarovna

Navoiy davlat pedagogika instituti O’zbek tili va adabiyoti

mutaxassisligi magistranti

<https://doi.org/10.5281/zenodo.14059250>

Annotatsiya. Mazkur maqolada Alisher Navoiy “Layli va Majnun” dostonidagi baytlarda ruju’ san’ati orqali tasavvufona g’oyalarning qo’llanishi, ularning baytlar sharhidagi o’rni, ma’nosi tahlil qilinadi. Tasavvufdagi ramziy ma’nolari sharhlanadi.

Kalit so’zlar. Tasavvuf, ramz, istiloh, badiiy san’atlar, ruju’ ,” Layli va Majnun” , sharh, nafs, komil inson, botiniy dunyo, majoziy ishq, ruhiy qiyofa.

THE TRANSMISSION OF MYSTICAL IDEAS THROUGH THE ART OF RUJU’ IN THE EPIC "LAYLI AND MAJNUN"

Abstract. this article analyzes the application of mystical ideas through the art of lipstick in the verse of Alisher Navoi “Layli and Majnun”, their role and meaning in the interpretation of bytes. The symbolic meanings of mysticism are interpreted.

Keywords. Mysticism, symbol, occupation, artistic arts, lipstick, " Layla and Majnun", interpretation, nafs, the perfect man, the whole world, figurative work, spiritual appearance.

ПЕРЕДАЧА МИСТИЧЕСКИХ ИДЕЙ ПОСРЕДСТВОМ ИСКУССТВА РУЖУ В ЭПОСЕ «ЛЕЙЛИ И МЕДЖНУН»

Аннотация. В данной статье анализируется использование мистических идей в стихах эпоса Алишера Навои «Лейли и Меджнун» через искусство руджу, их место и значение в трактовке стихов. Объясняются символические значения мистицизма.

Ключевые слова. суфизм, символизм, терминология, искусство, руджу, «Лейли и Меджнун», комментарий, нафс, совершенный человек, внутренний мир, образная любовь, духовный облик.

Sharqda so’zga buyuk inoyat sifatida qaralgan, balki shuning uchun azaldan sharqliklar nazmga moyildirlar. Nazm egalari esa so’zga yangi ma’no yuklashga harakat qilganlar, balki shuning uchun Sharq she’riyatida zohiriy ifodalar botiniy qarashlarni o’zida yashirgandir. Bu tushunchalar shuni bildiradiki, ijodkorlar misralarida tasavvuf olamining qarashlari o’z aksini topgan. Ma’lumki, tasavvuf islomda inson ruhiyati va ahloqiy jihatdan insonni komillik sari yetaklovchi, yo’llovchi ta’limot hisoblanadi. Tasavvuf bu- Ollohning birligi, Ollohdan boshqa

narsaga muhtoj bo'lmashlik, har qanday mol-mulk, boylik quliga aylanmaslik, sabr-qanoat qilib yashashdir. Shuningdek, bu ta'limotda komil inson maqomi, nafsni tiyish, bag'rikenglik, diniy donishmandlik, ruhiy barkamollik kabi g'oyalarni ilgari suriladi.

O'z davridayoq Sharqda ilmi bade'da "badoyi us-sanoyi", "sanoyei' lafziy" ("badiiy san'at") deb yuritiluvchi ma'naviy-uslubiy usul o'rganilgan. Badiiy san'atlar shartli ravishda ikkiga: ma'naviy va lafziy san'atlarga bo'linadi. Ma'naviy san'atlar so'z, ibora va jumlaning ma'no jihatlariga, lafziy san'atlar esa so'z va iboralarning shakli, jaranglashi, hattoki, xattiy chiziqlariga e'tiborni jalb qiladi.

Ma'lumki, A.Navoiy ijodida ham badiiy san'atlar o'zining original ifodalariga egaligi bilan ajralib turadi va ushbu badiiyliklar zahirida tasavvufona fikrlar bayon etiladi, ana shunday badiiy san'atlardan biri ruju' (arabcha - qaytish)¹ san'atidir. Bu haqda Fitrat shunday yozgan: "Shoir-adib o'z tuyg'ularini onglatib turgan chog'da, go'yo birdan ifodalashning yetishsizligini bilgan bo'lub, burungi so'zidan qaytadir-da, undan kuchlirak bir ifoda bilan so'ylaydir."²

Odatda, ruju' san'atida inkor ma'nosini beruvchi so'z va qo'shimchalardan foydalaniladi. Fikrimizni "Layli va Majnun" dostonidan olingan misollar bilan dalillaymiz. Masalan, ne inkor so'zi bilan:

Ul hajr tuniga subhi ummid,

*Ne subhi umid, mehri jovid.*³

Majnun Laylining qavmidan bo'lgan Zaydga (XXIV bob) "salomimni Layliga yetkaz" deb yoziladi. Zayd: "Sen haqingda Layliga xabar yetkazaman, bu xabar uning hijron tuni soya solgan qalbiga bir tongdan umid kabidir",- deydi va bu javobidan qoniqmay: "Yo'q bir tong emas, balki bu xabar uning qalbini quyosh kabi abadiy yorug' qiladi",-deydi. Ya'ni, qalbning yorug'lik istashi va yorug'lik nuriga intilishi ham Ollohning tajallisiga intilishdir. Birinchi misrada yashirin tashbeh qo'llanilgan bo'lib, shoir ikkinchi misrada bu tashbehdan chekinib, uni kuchliroq ifodalashga harakat qiladi. Bu bilan ma'shuqaning ahvoli yanada oydinlashtiriladi.

Shoir Laylining Majnun maktubidan iztirob chekishini (XXVII bob) tasvirlar ekan, Majnun Layliga yozgan maktubini keltiradi. Majnun Layli sifatlarini ta'riflashda ham o'z bahosidan chekinadi:

Ey nozu karashma bog'ida vard,

Ne vard, bahori nozparvard.

Bu o'rinda ham birinchi misrada tashbehli ifoda keltirilgan, ya'ni Layli gulga (vard)

¹ Hojiahmedov A. Badiiy san'atlar va mumtoz qofiya. -Toshkent, 1988. 47-bet.

² Fitrat A. Adabiyot qoidalari. -T.: O'qituvchi, 1995. 74-bet.

³ Alisher Navoiy. Layli va Majnun. -T., 1991. (Misollar mazkur kitobdan olindi).

qiyoslangan, biroq ikkinchi misrada Majnun bu ta'rifdan qoniqmay, *sen gul emas, balki gulg'unchasan*, deydi. Ma'lumki, Sharq adabiyotida *g'uncha* va *gul* timsollari nisbatan zidlantiriladi, *g'uncha tug'ilish, bahor, pinhonlik* ma'nolarida, *gul esa xazon bo'lish, kuz, oshkor bo'lish* kabi zohiriy va botiniy ma'nolarda qo'llanadi. Bu esa misralarda hayot sarhadlarida tasavvuf g'oyasi xususiyatlarini aks ettiradi.

Majnunning o'z to'yi oqshomida biyobonga ketib qolishi bobida (XXX bob) shoirning Navfalga ta'rifi keltirilgan. Unda ruju' qo'llangan misralar ham bor:

Kim Navfalkim Arabdadur toq,

Yo'q, yo'q, ne Arabki, toqi ofoq.

Shoir Navfaldek inson "Arabda toq, ya'ni yagona" degan sifatlashidan chekinib, "Arabdagina emas, balki olamda (ofoq) yagona" sifatlashini keltiradi. Bu misralarda Olloh tajallisiga ishora borligini anglash qiyin emas. Baytda ruju' san'atining yuzaga kelishiga birinchi misrada qo'llangan sifatlash sabab bo'lgan. Shuningdek, *yo'q* inkor so'zining takror qo'llanishi keyingi ta'rifning kuchliroq ifodalanishiga, diqqatni to'la tortishiga sabab bo'lgan.

Majnunning biyobonlarda vahshiy hayvonlar bilan do'st bo'lishi va ovga chiqqan Navfalga duch kelishi bayon qilingan bobda (XXI bob) ruju' san'atining original ko'rinishi qo'llanilgan:

Har yon bo'ri posbon itidek,

Yo'q, yo'q, ne dedim, shubon itidek.

Shoir Majnunning biyobonda kiyiklar galasi o'rtasida go'yoki cho'pon kabi yurganini, yonida esa bo'rilar qo'riqchi itdek uni himoya qilishayotganini ta'riflar ekan, bu ta'rifdan chekinib, ular qo'riqchi itdek emas, balki cho'pon itidek Majnunni va kiyiklarni himoya qilayotganini ta'kidlab tasvirni kuchaytiradi. Ma'lumki, itga mumtoz adabiyotda vafo timsoli sifatida qaraladi. Birinchidan, baytda chiroyli tashbeh qo'llanilgan, vahshiy hayvon bo'lgan bo'ri itga qiyoslangan. Ya'ni nafs yo'lida o'zini tiyib, Majnunga hamdarddek. Ikkinchidan, bu o'rinda itlardagi farq ko'rsatilgan va ruju' san'ati asosida isbotlangan. Sababi posbon it egasini himoya qiladi, cho'pon iti esa egasini va uning suruvini himoya qiladi. Uchinchidan, Majnundagi botiniy tasavvufona ishqning nafasi zohiriy ifodalarda betakrorlik kasb etgan. Bu ishq oldida vahshiy hayvon ham yuvosh tortib qolgan.

Shuningdek, ruju' san'atini yuzaga keltirishda inkor ma'nosidagi birliklar yetakchi rol o'ynaydi, ular vositasidagina fikrdan chekinganlik aniq anglashinib turadi. Bu birliklar yakka yoki takror, ba'zan esa ketma-ket keltirilishi mumkin. Bunday o'rinlarda fikrdan chekinish aniq bo'rtibgina qolmasdan, ekspressivlikka ham ega bo'ladi. Masalan, yuqoridagi misolda *yo'q* inkori takror qo'llanib qolmasdan, shoir poetik tasvirni o'ta ta'sirli ifodalash maqsadida yana bir inkorni

(*ne dedim*) qo'llagan.

“Layli va Majnun” dostonida ilohiy ishq zohiriy obrazlarda tasvirlangan ekan, shoir bu tasavvufona tasvirni aniq ifodalashda ruju’ san’atidan mahorat bilan foydalangan, desak xato bo’lmaydi.

REFERENCES

1. Hojiahmedov A. Badiiy san’atlar va mumtoz qofiya. –Toshkent, 1988. 47-bet.
2. Fitrat A. Adabiyot qoidalari. –T.: O’qituvchi, 1995. 74-bet.
3. Alisher Navoiy. Layli va Majnun. –T., 1991. (Misollar mazkur kitobdan olindi).